



PROCURA DE SA REPÙBLICA
in su Tribunale de Aristanis

Prot. n° 697/2021 U

Aristanis, 27 de abriłe de su 2021

SU PROCURADORE DE SA REPÙBLICA

bidu su d.l. n. 18 de su 17 de martzu de su 2020, cunvertidu, cun mudaduras, in sa l. n. 27 de su 24 de abriłe de su 2020 e ancoras mudadu dae su d.l. n. 28 de su 30 de abriłe de su 2020, cunvertidu cun mudaduras in sa l. n. 70 de su 25 de làmpadas de su 2020;

bidu su d.l. n. 19 de su 25 de martzu de su 2020, cunvertidu, cun mudaduras, in sa l. 35 de su 22 de maju de su 2020;

bidu su d.l. n. 34 de su 19 de maju de su 2020, cunvertidu, cun mudaduras, in sa l. n. 77 de su 17 de trìulas de su 2020;

bidu su d.l. n. 83 de su 30 de trìulas de su 2020, cunvertidu, cun mudaduras, in sa l. n. 124 de su 25 de cabudanni de su 2020;

bidu s'art. 10 de su d.l. n. 52 de su 22 de abriłe de su 2021, chi, mudende s'art. 1 de su d.l. 19/20, at perlongadu s'istadu de emergèntzia sanitària ligadu a s'isparghidura de sa COVID-19 a su 31 de trìulas de su 2021;

bidu su d.p.c.m. de su 24 de santugaine de su 2020, e a manera particolare s'art. 3, comma 2, chi prevedet chi *“in su cuncordu, fintzas faghende protocollos aposta, de is provvedimenti chi serbint pro assicurare s'abertura noa a bellu a bellu de totu is ufizios pùblicos e sa torrada in segura de is dipendenti in is maneras prevididas dae s'artìculu 263 de su decretu-lege 19 de maju de su 2020, n. 34, cunvertidu, cun mudaduras, dae sa lege 17 de trìulas de su 2020, n. 77, is amministrazioni pùblicas assurant su respetu de is pretzetos in contu de amparu de sa salute apostivados dae is autoridades cumpetentes”*;

bidu su d.l. n. 137 de su 28 de santugaine de su 2020, e a manera particolare is artìculos 23 e 24 chi apostìvigant disponimentos pro su faghimentu de is fainas giurisdizionales e pro sa semplificatzione de is fainas de presentada de atos, documentos e demandas sende presente s'emergèntzia epidemiològica de sa COVID-19, fintzas in dèroga a su chi apostìvigat s'art. 221 de su d.l. 34/20;

bida sa tzirculare de su Ministeru de sa Salude de su 12 de santugaine de su 2020;

bidu su decretu de su Ministru pro s'Amministrazione Pùblica de su 19 de santugaine de su 2020;

bida sa delìbera de su Consìgiu Superiore de sa Magistradura de su 26 de martzu de su 2020 chi at frunidu "*Lìneas ghia a is Ufìtzios Giuditzìrios in contu de s'emergèntzia COVID-19 chi remplasant de su totu cuddas bogadas in antis*";

bida sa delìbera de su Consìgiu Superiore de sa Magistradura de su 4 de onniasantu de su 2020 chi giughet "*Emergèntzia Covid - Lìneas ghia a is ufìtzios giuditzìrios*", in ue a manera particolare pregat a is dirigentes pro chi "*apostìvighent - o cunfirmant s'eficàtzia de - disponimentos pro regulare s'intrada a is ufìtzios giuditzìrios e a ismenguare is cuntatos personales chi podent favorèssere s'isparghidura de s'impestu o impeigare sa possibilidade de tratzamentu in casu de impestu*", fintzas cun - "*si non s'est giai fatu - s'aprovu de protocollos pro regulamentare s'intrada de is utentes (fintzas cun ainas de prenotatzione de is intradas, chi comente si siat permitant de intrare a is ufìtzios in tempos cumpatìbiles cun s'urgèntzia eventuale de sa domanda), e fintzas s'aprovu de àteros disponimentos utilosos, proportzionados e chi no ingendrent atropèllos de gente*";

bidas is tzirculares de su Ministeru de sa Giustìtzia bogadas in data 24 e 27 de freàrgiu, 3 de martzu, 24 e 27 de abriale 2020 e is lìnias ghia de s'INAIL chi bi sunt mentovadas;

bidu e mentovadu su "*Protocolu de seguresa anti-impestu COVID-19*" cuncordadu dae su Responsàbile de su Servìtziu de Preventzione e Amparu de su Tribunale e de sa Procura de sa Repùblica de Aristanis in data 9 de maju de su 2020 e firmadu in data 11 de maju de su 2020;

bidu e mentovadu su "*Protocolu pro sa regulamentatzione de is intradas a su Palàtziu de Giustìtzia de Aristanis pro sa gherra e pro s'allacamentu de s'isparghidura de su virus COVID-19*" firmadu cun su Tribunale de Aristanis e cun su Consìgiu de s'Òrdine de is Abogados de Aristanis in data 11 de maju de su 2020 pro asseguare, a un'ala, cantu prus faghet, su faghimentu regulare de is servìtzios pro is utentes e, a s'àtera ala, pro asseguare a is traballadores s'amparu prus mannu dae s'arriscu de impestu de su virus COVID-19;

bidas e mentovadas is "*Mudaduras a su Protocolu pro regulare is intradas a su Palàtziu de Giustìtzia de Aristanis pro parare fronte e allacane s'isparghidura de su virus COVID-19*" firmadas cun su Tribunale de Aristanis e su Consìgiu de s'òrdine de is Abogados de Aristanis in data 1 de triulas de su 2020 pro is tareas mentovadas in antis;

bidu su bisòngiu de sighire a dare aplicu a is disponimentos de cautela e a is racumandatziones prevìdidas pro totu su territòriu natzionale e, in su pròpiu tempus, de assegurare a s'utèntzia cantu prus faghet de pòdere gosare de is servìtzios de custu Ufìtziu sena de istorbos;

bidu su chi disponet s'art. 1, comma 2, de sa l. n. 75/20, chi previdet chi “*abarrant bàlidos is atos e is provedimentos pigados e sunt sarvos is efetos e is raportos giurìdicos nàschidos cunforma a s'art. 3, comma 1, lìtera i), de su decretu-lege 30 de abriale 2020, n. 28*”;

apretziadu, duncas, de dèpere apoderare is disponimentos ispetzìficos pro su cuncordu de is servìtzios pro su pùbliku apostivigados in fines cun su provedimentu prot. n. 161/2021.U de su 29 de ghennàrgiu de su 2021, pro transire s'arriscu de cuntatos de acanta, cunsideradu chi is locales de sa Procura non sunt adatos pro assegurare is comportamentos igiènicu-sanitàrios prevìdidos in s'alliongiadu 1 a su d.p.c.m. de s'8 de martzu 2020, e a manera particolare de cussu prevìdidu in sa lìtera d) (“*su respetu, in is relatas sotziales, de unu tretu de a su mancus unu metru intra de una persone e s'àtera*”), ma, in su pròpiu tempus, de ddos mudare e de ddos illebiare in parte pro is resones inditadas a subra;

mentovadu su Protocolu de acòrdiu firmadu in data 23 de martzu de su 2020 cun su Consìgiu de s'Òrdine de is Abogados de Aristanis, pro sa presentada de domandas e pro su retiru de atos a manera telemàtica (Prot. 25/2020 INT de su 23 de martzu de su 2020), chi si regordat totu inoghe a subra:

***Protocolu de acòrdiu intra de
sa PROCURA DE SA REPÙBLICA IN SU TRIBUNALE DE ARISTANIS
e su CONSÌGIU DE S'ÒRDINE DE IS ABOGADOS DE ARISTANIS***

Sa Procura de sa Repùblica de Aristanis e su Consìgiu de s'Òrdine de is Abogados de Aristanis

pro assegurare cantu prus faghet su respetu de is disponimentos de cautela e is racumandatziones prevìdidas pro totu su territòriu natzionale pro prevènnere e allacànare s'isparghidura de s'impestu de COVID-19 e, in su pròpiu tempus, pro permitere a is Abogados su faghimentu de is fainas professionali chi non si podent transire acapiadas a su si leare s'incàrrigu de sa defensa, mancari in una simana in ue is fainas giuditziàrias sunt sutapostas pro lege a ismènguas mannas

mentovados is disponimentos chi s'agatant in su provedimentu Prot. 21/2020 INT de su 19 de martzu passadu de su Procuradore de sa Repùblica chi regulamentat a manera generale s'intrada de su pùbliku a is locales de sa Procura de sa Repùblica

*cunsideradu chi, cun sa tarea espressada a subra e sena de nòghere a su gosamentu de su deretu de defensa, paret pretzìsu a ismènguar ancoras is ocasiones de intrada de persones a is locales de sa Procura de sa Repùblica, cunsideradu chi non sunt adatos pro respetare is inditos igiènicu-sanitàrios de s'alliongiadu 1 a su d.p.c.m. de s'8 de martzu de su 2020, e a manera particolare cussu de sa lìtera d) (“*su respetu, in is relatas sotziales, de unu tretu de a su mancus unu metru intra de una persone e s'àtera*”)*

cunsideradu pretzìsu su de impreare is ainas informàticas chi resurtenant seguras pro su chi pertocat sa mandada de domandas dae parte de is Abogados e de is rispostas dae parte de is ufìtzios de sa Procura de sa Repùblica

ISTABILESSENT PARIS SU CHI SIGHIT

1. Is Abogados s'ant a bàlere, pro sa presentada de demandas, de su canale telemàticu isceti, faghende-ddas arribare dae un'indiritzu issoro de posta eletrònica tzertificada a sa Procura de sa Repùblica a custu indiritzu de posta eletrònica tzertificada:

urp.procura.oristano@giustiziacert.it.

2. Is provvedimenti pigados chi pertocant is demandas retzidas aici s'ant a comunicare, in sa pròpia manera telemàtica, in risposta a s'indiritzu de su chi ddas at mandadas.

3. Pro is demandas in ue tocat a pagare deretos (pro esempru, sa cunsigna de còpias), s'Ufìtziu pro is relatas cun su pùbliku (U.R.P.) o sa segreteria de su magistradu, cun is maneras iscritas in su nùmeru de in antis, at a comunicare su tantu chi tocat a pagare a su domandadore, chi at a dèpere mandare s'iscansione de sa domanda cun sa marca de bullu giusta annuddada.

4. Sa presentada dereta a s'isportellu de s'U.R.P. de is demandas o, a manera subordinada, su retiru de su chi s'est domandadu, in is oràrios e comente istabilèssidu a manera generale, est permitida isceti si non faghet a ddu fàghere in is maneras inditadas in is nùmeros de in antis.

Sutaliniadu chi su protocollu mentovadu in antis si depet cunsiderare bàlidu pro sa presentada de totu is atos francu cussos prevididos dae s'art. 24, comma 1, de su d.l. 137/20, est a nàrrere “*memòrias, documentos, demandas inditadas dae s'artìculu 415-bis, comma 3, de su còdighe de protzedura penale*” chi, cumentzende dae oe, pro more de s'abertura de su portale de su protzessu telemàticu at a dèpere sighire custa protzedura isceti e at a funtzionare fintzas a sa frunidura dae parte de su Direttore generale de is sistemas informativos e automatizados de su Ministeru de sa Giustìtzia de s'indiritzu PEC aposta pro presentare is atos inditados dae su comma 4 de s'art. 24 de su d.l. 137/20

Mentovada sa diretiva de su 12 de martzu 2020 mandada a sa polìtzia giuditziària in contu de is règulas chi bolent sighidas pro sa mandada de is novas de reatu e de su chi nde sighit a manera telemàtica (Prot. 403/2020 U de su 12 de martzu de su 2020), chi si mentovat totu inoghe a suta:

SU PROCURADORE DE SA REPÙBLICA

Bidos su d.l. n. 6 de su 23 de freàrgiu de su 2020, su d.l. n. 9 de su 2 de martzu de su 2020 e su d.l. n. 11 de s'8 de martzu de su 2020;

Bidos su d.p.c.m. de s'8 de martzu de su 2020, su d.p.c.m. de su 9 de martzu de su 2020 e su d.p.c.m. de s'11 de martzu de su 2020;

Bidu su bisòngiu de dare aplicu a is provvedimenti de cautela e a is racumandatzones prevididas pro totu su territòriu natzionale;

Cunsideradu chi:

- serbit a assegurare su faghimentu regulare de is servìtzios e, a s'àtera ala, transire s'arriscu pro cantu prus faghet chi is traballadores nde pischent su virus;
- pigada a cunsideru sa mammària de su territòriu chi faghet parte de custa Procura de sa Repùblica in ue ddoe sunt comunes chi sunt a tretu mannu dae custa sea e àteros chi sunt a suta de sa cumpetènzia amministrativa de sa Provìntzia de Nùgoro, pro sa presentada dereta a s'Ufìtziu de Retzimentu de is Atos de is novas de reatu e de su chi nde sighit de protzedimentos giai iscritos nche bolet tempus meda dae parte de is Fortzas de Polìtzia impignadas in servìtzios de importu e urgentes de castiamentu de su territòriu pro dare aplicu completu e giustu a is disponimentos de prevenzione de s'isparghidura de s'impestu de COVID-19;

- su sistema de mandada de is novas de reatu cun su portale dedicadu immoe amegant de dd'isperimentare;

APOSTÌVIGAT

cun efetu dae immoe e fintzas a s'iscadèntzia de is provvedimentios chi imponent proibimentos e cautela in su si transire in su territòriu natzionale e chi, pro immoe, s'istabilesset in sa data de su 3 de abriale imbeniente chi:

1. totu is novas de reatu noas chi s'ant a dèpere presentare a custa Procura de sa Repùblica, francu pro bisòngios iscumproados de ddos cunsignare a manera dereta, si mandent isceti a custu indiritzu de posta eletrònica

cnr.procura.oristano@giustiziacert.it

2. totu su chi sighit a protzedimentos giai iscritos in custu Ufìtziu, francu pro bisòngios iscumproados de ddos cunsignare a manera dereta, si mandent isceti a s'indiritzu de posta eletrònica de su Remplasadore assignatàriu chi si regordat inoghe a suta:

segr.basso.procura.oristano@giustizia.it

segreteria.bagattini.procura.oristano@giustizia.it

segreteria.chelo.procura.oristano@giustizia.it

segreteria.decrescenzo.procura.oristano@giustizia.it

segreteria.ghiani.procura.oristano@giustizia.it

segreteria.mammone.procura.oristano@giustizia.it

segreteria.mascia.procura.oristano@giustizia.it

Is destinatàrios de custu provedimentu si nd'ant a incurare de ispàrghere a is ufìtzios e a is repartos chi dipendente dae issos e, in prus, ant a fàghere a manera de nd'averiguare s'aplicu firmu.

APOSTÌVIGAT

cun efetu dae immoe e fintzas a sa data de su 31 de trìulas de su 2021, francu àteros perlongamentos o mudaduras, su chi sighit:

- sa diretiva de su 12 de martzu de su 2020 fata a sa polizia giudiziària (Prot. 403/2020.U) est prorogada de su totu;

- su Protocollu de acòrdiu intra de sa Procura de sa Repùblica de Aristanis e su Consìgiu de s'Òrdine de is Abogados de Aristanis firmadu in data 23 de martzu de su 2020 (Prot. 25/2020.INT), intesu in contu de custu su Presidente de su Consìgiu de s'òrdine chi est de acòrdiu, est prorogadu, pro is atos chi non si prevedet a ddos presentare a òbligu cun su portale de su protzessu telemàticu, cun is mudaduras introdùsidas cun su provedimentu prot. n. 161/2021.U chi inoghe sunt mentovadas de su totu;

- su personale de su servìtziu de miramentu chi s'agatat in s'intrada at a permitere sa passada de is utentes cunforma a is maneras istabilèssidas cun is "Mudaduras a su Protocollu pro regulamentare is intradas a su Palàtziu de Giustìtzia de Aristanis pro parare fronte e pro allacanare s'isparghidura de su virus COVID-19";

- s'oràriu de abertura pro su pùblicu est cussu ordinàriu, istabilèssidu aici: dae su lunis a su sàbadu, dae is 8.30 a is 13.30;
- s'intrada a is locales de sa Procura chi s'agatant in su de duos pranos de su Palàtziu de Giustìtzia s'ghit a èssere permittidu dae s'iscala de mesu isceti;
- s'intrada dereta a is ufizios de is Sennores Abogados, de sa Politzia Giudiziària e de is utentes de foras est permittida cun custas cunditzones:
 - no est ammittida sa presèntzia de prus de una persone in is ufizios e in is segreterias, a prus de su personale chi ddoe traballat, pro respetare is disponimentos in contu de s'istesiamentu intra de una persone e s'àtera;
 - no est ammittidu a si firmare pro bìere is fascìculos in is passaditzos de a intro de is Ufizios de sa Procura, pro no ingendrare atropèllos, francu sa castiadura telemàtica de atos chi si podet fàghere in is postas chi s'agatant in is locales apostas;
- pro respetare custos disponimentos, is Sennores Abogados, sa Politzia Giudiziària e is utentes de foras ant a domandare is fascìculos chi bolent castiare a is Ufizios Dibatimentu e Esecutziones de s'isportellu "Retzimentu de is atos", in ue ddoe est su bidru de seguresa e, pro su chi pertocat is fascìculos chi bolent castiare in is Segreterias de is Magistrados, ddos ant a pedire a s'operadore de su miramentu;
- su personale in servitziu in s'Isportellu e s'operadore de su miramentu ant a preguntare a su personale interessadu su permissu pro fàghere intrare a su domandadore, si ddoe sunt is cunditzones mentovadas a subra;
- sa pròpia protzedura s'at a sighire pro faeddare cun is magistrados; inoghe puru at a pòdere intrare una persone isceti, francu cando pro bisòngios chi non faghet a transire ligados a su faghimentu de atos de indàgine est pretzisa sa presèntzia de prus de una persone;
- is Sennores Abogados ant a pòdere sighire a domandare de faeddare cun is magistrados pighende in antis s'apuntamentu cun su telèfono, domandende-ddu a sa segreteria de su magistradu; su magistradu at a istabilèssere sa data e s'ora de retzimentu, dende inditos a sa segreteria pro ddu comunicare - semper cun su telèfono - a su domandadore;
- is utentes s'ant a pòdere acostiare a s'isportellu e a sa posta de s'operadore de su miramentu isceti si ddoe est su tretu lìberu pro assegurare su respetu de is disponimentos in contu de istesiamentu intra de una persone e s'àtera e ant a abetare su turnu issoro a tretu de seguresa, foras de sa lìnìa colorada marcada in su pamentu e sena de ingendrare atropèllos;
- si racumandat de si sètzere in is cadiras a manera de respetare su tretu de seguresa, lassende bòida a su mancus una cadira intra de una persone e s'àtera, comente inditadu in is cartellos apostas;
- totu su personale de sa Procura at a dèpere portare a òbligu is maschereddas chirùrgicas in frunidura cando non s'agatat a intro de s'apomentu suo e fìntzas a intro de s'apomentu, si non faghet a assegurare su tretu mìnimu de seguresa intra de una persone e s'àtera; su personale, comente si siat, depet respetare is àteros

disponimentos apostivigados in su “Protocollu de seguresa contras de s’impestu de COVID-19”;

- su personale in servìtziu est autorizadu a domandare s’impreu de is trastos de amparu de is canales de sa respiratzione, inditados, in fines, in s’art. 3, comma 3, de su D.P.C.M. de s’11 de làmpadas de su 2020 o in provedimentos bogados a pustis cun argumentu sìmile, a totu is persones chi a cale si siat tìtulu intrent a is locales de sa Procura;

- pro totu su chi no est prevididu a manera crara in custu provedimentu si mandat a is disponimentos chi s’agatant in fines in su d.p.c.m. de su 24 de santugaine de su 2020 o in provedimentos afatantes de sa pròpia orìgine e de argumentos sìmiles chi ant a essire in su tempus benidore.

Si comùnichet:

- a is Collegas;

- a is Vitze Procuradores Onoràrios;

- a is setziones de politzia giuditziària;

- a su personale amministrativu;

e fintzas, pro connoschèntzia pretzisa:

- a Senn. Presidente de su Tribunale;

- a Senn. Presidente de su Consìgiu de s’Òrdine de is Abogados de Aristanis, fintzas pro l’ispàrghere a is Consìgios de s’Òrdine de is àteras Abogaduras de Sardigna;

- a su personale chi si nde incurat de su miramentu.

Custu provedimentu s’at a mandare:

- a Senn. Procuradore Generale de sa Repùblica de Casteddu;

- a Vossignoria su Prefetu de Aristanis;

- a Sennores Cuestores de Aristanis e de Nùgoro;

- a Sennores Cumandantes Provintziales de is Carabineris de Aristanis e de Nùgoro;

- a Sennores Cumandantes Provintziales de sa Guàrdia de Finàntzia de Aristanis e de Nùgoro;

- a Senn. Cumandante de sa Politzia Locale de Aristanis, cun pregadoria de ddu comunicare a is cumandos de is comunes de sa tzircuscrittzione giuditziària.

Su Procuradore de sa Repùblica

Dot. Ezio Domenico Basso